



** MEISTER GIELKE **

Oet de serie

- De **BABYBOOM- GENERATIE** -

Deil 5

Meister Gielke

Vreuger hote d'r vuuël, Sef, Jan, Piet of Wielke
En die kreges allemaol les van meester Gielke

Van 1958 toet 1960 probeerde dae ós van alles te liere
Lag alles netjes oet, maar lever neet 'ne gas kieëre

Hae waar de lieraar van de letste twieë sjoelklasse, dae veur toen kreges
En goof ouch maar zelde 'n nege

Ouch goof hae ós nao veer oer bieles
In klas vijf en zes

Gielke zien haor hóng 'm neet veur de glaze of euver ziene bril
Hae zoog 't meestal good en zag: "Ik zie wat ik zien wil"

Loos dae meester oet 'n book veur den waas 't muuskessjtil
Meestal waar det 'nn book van Pim Pandoer, Arendsoog, of ein of angere dieke pil

Thoes waar hae ech 'ne gedege familievader
Dae voldeej aan 't gesjtelde pappiekader

Dae boete de sjoel vuuël van zien vrouw en kinjer heel
Ich zeen 'm zitte met 'n good book, 'n krentje en sigarke, wat 'm good beveel

Gielke ging neet nao de kroeg haer
En reej ouch neet op eine Harley Davidson wie meester Quaer

Quaer speelde fiejoeël en Gielke bie ós "de ieërste fiejoeël"

Meister Gielke waar eine goeje lieraar op sjoel
Dae sjnel doorhaaj, welk vleis hae in de kuup haaj

Of wat veur waal of neet good deje
Goof hae sjtraof waar det meital met ein of angere goeje reje

Waar emes ónbesjoef of heel dae neet ziene sjnavel
Kós dae rechtsjtreeks nao 't houf van de sjoeël, Quaer of van Bavel

Meister Gielke lieërde ós de sjoeël good aaf te sjloete
Met of zónger bieles ginge veur nao 'n angere sjoeël örges dao boete

Ich weit nag van de Franse bieles, un chat noir
Die zjwarte kat, vrie vertaald, die waal ens ken zorge veur get "gevaar"

Seksuele veurlichting kreeg bie ós op sjoeël genne aandach
En doe kreegs se net neet om dien oeëre, as dao emes get euver zag

De Sint-Lambaersjoeël sjoof det opzie
En zoe lang veur nieks wiste brach de ooievaar de kinjer sjteeds opnie

Nao de Ruiverse kermis woort op de kezelemert
bie Jacobs ziene frietkraom nao sjtumpkes sigarett gezóch
En 'n paar jónge van ós klas maakde dao sigarett van, det waar echte bóch

In juni in de trein belaeft veur as klas 'n ech vakantiegeveul
Det waar 'ne echte tjoek-tjoek-tjoek met keihelle sjteul

Veur reisde nao de zieë nao det sjoeëne groeëte witte sjtrandj
Gans dao nao Hoek van Hollandj

Óngerwaeg zónge veur leedjes bie de vleet
Zoe-as "de geite höbbe sjoeël en de boeke neet"

Aangekómme bie 't sjtrandj loog det vol met blieje
Die deje veur, net wie veur asof zie kóste zjwumme dao in die roewe zieë

Bie Diergaarde Blijdorp moogde veur neet in de lieëwe- of baerekoel valle
Want den zólle de luuj oppe Ruiver dao noe nag euver kalle

De hoeëgste klasse ginge ouch nag nao Schiphol en "zoge ze vlege"
Ich waar d'r neet bie, want den zól ich d'rom mótte lege

Meister Gielke goof mien elders 't advies nao welke sjoeël ich kós gaon
Hae goof zoegezag richting aan mien besjtaon

Gielke waar genne tummerman, maar houde bie mich de plank duchtig mis
Hae waar dae meister, dae bie ós 't dökste in gedachte waar of is

Noe haaje veur de kleutersjoeël en de sjoeël van Sint-Lambaer gans aaf
Maar twieë kieër zónger diploma en, ha ha, toch draaf

Ózze lieëgere sjoeëltied waar hielemaol veurbie
En alles begós weer van veuraaf aan, anders en gans opnie

JOHN GUBBELS

(Met get dichterlike vrieheid)